

**Uunga siunnersuut: Aalisarnermut aningaasaliissutinut immikkoortitat pillugit
Inatsisartut inatsisaata allangortinneqarneranik Inatsisartut inatsisaat nr. xx xx 2011-
imeersoq**

(Tapiisarnermut tunngavissanut allangortitsineq)

Saqqummiussissut

(Aalisarnermut, Piniarnermut Nunalerinermullu Naalakkersuisoq)

Siullermeerneqarnera

Inatsisartut inatsisaata aalisarnermut aningaasaliissutinut immikkoortitat pillugit allangortinnissaanut siunnersuut matumuuna Naalakkersuisut sinnerlugit saqqummiutissavara. Tassa aalisariutit isaternissaanut tapiisarnerni malittarisassat pillugit.

Isaterisarnernut tapiisarnerni ataatsimiititaliap ilaasortaannut aalisartut nassuiaasimapput isaterinissamut tapiissutip appasippallaarnera pissutigalugu qinnuteqaateqartarsimanatik. Tamatumunnga peqqutaapput angallatip sillimaserneqarnerani amerlasuutigut nalikipallaarnera, imaluunniit angallatip sillimaserneqarsimanninnera. Tamassumallu aamma kingunerisimavaa angallatinik isaterisarnerni malittarisassat atuuttut atuutilerneraniilli ikippallaarsimaneri.

Siunnersuutilli saqqummiunneqartup ajornartorsiutit taakku qaangerniarnerinut ikiuutaassaaq. Siunnersuutip kingunerisimavaa isaterinermut tapiissutip angallatip sillimaserneqarnerata nalingata maanna atuuttup 75%-iniit 100%-inut qaffannissaa. Angallatit sillimaserneqarsimannigitsut arlaannaannulluunniit attuumassuteqannigitsumiit, Aalisarnermut, Piniarnermut Nunalerinermullu Naalakkersuisoqarfimmiit toqqarneqartumiit, nalilerneqarsinnaalernissaat periarfissaalissaaq.

Siunnersuutillu isaterinissamut tapiissutinik qinnuteqartarneq soqutigineqarnerulernissaa siunertaraa, tassa tapiissutip annerpaaffissaata qaffanneratigut, kiisalu angallatit sillimaserneqarsimannigitsut nalingisa missiliuussaq naapertorlugu inissinneqarnerisigut. Aamma malittarisassat maanna atuuttut atuutileqqaarneraniit siunertaasimasumut isaterisarnissanut siunnersuut soqutiginninnerulersitsissaaq.

Allanguutissatut saqqummiunneqartut isaterisarnernut tapiisarnerni ataatsimiititaliamit isumaqatigineqarlutik taparserneqarput.

Taamatut oqaaseqarlunga allanguutissatut siunnersuut Inatsisartunut suliassanngortippara.